

Johannes der Täufer

Heischrecke, wann mer sunscht nix hat,
getunkt in Honig, macht a satt.
Aus Kamelhaar un so Sache
kann mer sich e Mantel mache.

Socke braucht mer net un Schuh,
wann mer ständig, immerzu
im Wasser vun dem Jordan steht
un dort vun morjens früh bis spät
de Leit macht Wasser uff de Kopp.
Änner no'm anner, allohopp,
Männer, Fraue, Herre, Dame
wer'n do gedaaft in Gottes Name.

Wer is der Mann, der all das kann?
Er wissen's, gell? Er hääßt Johann!
Oder Johannes - oder Jean
deht mer in de Palz do saa.

Weil jeder zu'm zum Daafe rennt,
mer ne aa de Täufer nennt!

Aa Jesus, am e schääne Daa,
er kam grad aus Galiläja,
tat schurstracks hie zum Ufer laafe,
denn Johannes sollt ne daafe.

„Mei lieber Jean, ich hann vernumm,
do werd gedaaft. – Drum bin ich kumm!
Un du, so heert mer iwwerall,
wärsch kompetent fer denne Fall!
Do misst's bei mir doch aa gelinge!
Soll ich glei ins Wasser springe?“

„Nor net so schnell, gemacht, mei Knecht!
Ich bin vum Fach, do hasch du Recht!
Doch in dei'm Fall, do wääß ich net,
ob ich die Kompetenze hätt.“

„Wieso dann das?
Los, mach mich nass!
Brieh uff de Kopp.
Und fertig, hopp!“

„Wääsch du dann net, wer vor mir steht?
Wääsch du net, wer du bisch?
Der Spieß geheert erumgedreht
un du mischt daafe mich!“

„Jetzt mach kää Worte un fang aa.
Ich will net do de ganze Daa
am Ufer steh und diskutiere.
Hann viel zu tu, es duht pressiere!“

Do hat Johannes ihn gedaaft. -
- Wie Jesus dann an's Ufer laaft,
do gäbt's e Knall un glei dodruff
duht sich de ganze Himmel uff.

Un e Täubche fliegt herunter
un e Stimm verkündet munter:
„Des is mei Sohn, den ich gesandt.
Zieh hin, mei Bu, rette das Land!“

Bemerkt sei neweher am Rand:
Dies Liedchen damals wohl entstand:
*Muss nur noch kurz die Welt retten,
danach flieg ich zu dir ...*

„In Ordnung, Babbe! Tschüß, bis dann!“
Un zum Johannes saat der Mann:
„Hab Dank fer alles – un denk draa:
De Kopp immer no owwe tra!“

„De Kopp no owwe, Chef, das is
eher e bissje ungewiss.
Ich glaab nämlich uff känne Fall,
dass ich mei Kopp noch lang behall.“

Un wie uns die Bibel lehrt,
war der Gedanke net verkehrt!

Denn durch eines Weibes List,
er schunn ball de Kopf vermisst!

*Wie jedes Jahr an dieser Stell
sing ich noch e Liedche schnell.*

Lied zum Text (Rot sind die Rosen)

Wann die Sunn uffgeht un e neier Daa erwacht,
hat sich mancher schunn zum Jordan uffgemacht.
Am Ufer stehn e Haufe Leit,
do aus de Näh un vun ganz weit.
Die wollen all sich daafe losse heit.

|: Jo-han-nes, dätsch du uns daafe?
Klar doch, kommt her in Gottes Name.
Nix wie erei do, allo hopp,
e Händche Wasser uff de Kopp
un schunn isses passiert! :|

Un de Jesus stand aa ämol in de Reih.
Em Johannes war's gar net so wohl debei.
Hat sich gewunne un geziert
un ihn zu daafe sich geniert.
Doch Jesus guckt ne a un saat zu ihm:

|: Jo-han-nes, dätsch du mich daafe?
Jo dann, komm her in Gottes Name.
Nix wie erei do, allo hopp,
e Händche Wasser uff de Kopp
un schunn isses passiert! :|